

祝
子
罪
知
錄

祝子罪知錄序

王子曰是非之變若棼絲然有一人之
是非有一事之是非有片言可折之
之非有千古不決之是非後之君子
以柰何之存其迹而已矣曷為存
有案矣曰有斷矣則未知

是、而非、也與其所以取是非
者的然而無萬一訛也信傳信疑傳
疑一人不以一事蒙一事不以一人廢
開眼界于片言竄齒餘于千古好
而知其惡惡而知其美殆庶幾焉若
曰同不足以標勝姑以異為奇其不

然其不然倒道而言君子弗言也要
使東脩之儒顧影自畏善雖小而務
聚愚雅細而必捐則君子表微之功於
斯為大或曰尚父戮華士而周公咎
之顏回攫釜而孔子疑聖哲相信之
案目擊之事而猶爾之又况其終

如者乎安用存雖然天下而無是非
可也天下而有是非也者與其過而
已寧過而存磨鑑考衡揆遐剔幽
小人怨矣君子則否夫然則知我罪
我奚恤焉祝子所為綜是非之案
斷而命曰罪知者蓋如此

文待詔先生嘗占余言是書足千古
不可湮廢余無從索閱偶養疴弇
園友人持京兆公手筆占其長君
方伯公親錄副本得遍觀之其間上
下今昔闡揚媿慙卓然是非之宗匠
也余喜其不占世波也為書簡首而

德就之

萬曆壬申二月日

瑯琊王世貞

顯祝子罪知二十二韻

祝子挺實甚舉利布日編惠收耳
耳者東郭混姝姤或以覆故隱蔚
臭羊不羶亦有吠非主竟源為倒
顛直道隔兩鉤一宿長憎然鄉
北魯中叟穢史空如椽乃發光

明藏陳事日益鮮陰劉偽忠孝
旌榜真聖賢玉碎價且石豈貴
瓦礫全朽骨不可肉寒暄各重泉
迄觀載籍博經旨以俟皇皇質
彫文匪在齒頰迄兩袖袖上氣衆
妙澄九淵染毫風雨玉楊子應

無言嗟等死宋帛以三百篇爲
心慨以懷元韻孤芳蓮鬼神渺
有無陰陽自糾纏是弱無古今
泚說皆枝駢念茲卽方來暉並
日月縣勾入商儒口駟語好惡
從余弱鍾奇癖不謂魏石堅朝

菊與德祐而庸知大年

壬午秋初同枝山先生留石湖
僧舍漏二鼓見先生手持一
卷昂起索閱先生曰此予纂
集新聞品第昔人名眾知錄
蓋三年於茲矣因是得細閱

之與性甫相顧聲錯謬賦部
詞竟忘魄陋激明謹識



祝子罪知錄自序

敘曰允明異夫近代學士辨之弗明輒措安之往往視古人臧否事爲應趨背勸懲每至朱紫易采土炭倒衡非盡由其不思抑黨同比周迷棄本情怵勢以乏勇也于是素所研攬好惡必察平心反覆羣而不黨姦醜旣辯予奪皎然其間慕善若懿親疾姦猶至仇烝民秉彜迴鑒卽得何必強抑皇昇偏逐時情者哉然以爲至當無二未決諧否期就有道積久弗露今焉日月逝矣河清幾時一日翩然取一一大者發

列之命曰罪知、或有往昔譏評、懸符鄙見、同心之言、其臭如蘭、亦頗條撮梗系而輔之、然斯本自心師、非勞旁啟、故時復爾、弗藉繁援、又如

朝章風草、理絕從違、世務蒿昧、談非容易、不忘言者、

具在通雜二篇、

余有子通
子維二書

茲亦不及噫嘻、是耶非耶、

我不敢知、蓋宇宙茫茫、終歸腐亡、聊自信以行志、無論知不知、毀譽禍福、雖然、將恐罵者滔滔焉、亦聽之而已矣、

祝子罪知錄自序

畢

祝京兆著作甚富有懷星堂集行在
此罪知錄乃採集舊聞必註出某書見
非其所自撰也故又名曰纂言舊板剥
蝕已久其孫子願為名山之藏適
撫臺周老大人訪及遺書移文吳縣捐
俸重脩然已僅十之二矣

域外史書

視子罪知錄目錄

卷一

舉祭必犧炎皇

刺湯武

刺伊尹

刺孟軻

卷二

刺孟性善荀性惡

刺趙匡胤

刺趙匡義

卷三

刺今世予奪多誤

予夷齊

予武庚

予管蔡

奪管夷吾

予莊子

予陳湯甘延壽

奪楊雄

奪嚴光

予謝安謝玄

奪鄧攸

奪王珪魏徵

予徐敬業

予李青蓮

予李德裕

予韓偓

予楊凝

予李筠劉鈞

奪种放

奪張浚

奪許衡吳澄趙孟頫

奪楊維禎

卷四

匿非近黨

韓愈

陸贄

歐陽修

石介

趙鼎

趙汝愚

沒善近刻

柳宗元

馮道

善善過短

白居易

楊億

徐鉉

寇準

蘇洵

蘇軾

蘇轍

惡惡過長

韓侂胄

李煜

譽之不盡

范希文 司馬君實

著而不揚

杞迹不原

李陵 字子虛中

曲陷不聞

盧多遜

卷五

刺趙普

刺王安石

刺程頤

刺朱熹

刺道學

卷六

論釋上

卷七

論釋下

卷八

舉六經

刺韓柳歐蘇四大家又刺益曾鞏王安石作六家者甚繆誤人

卷九

舉詩各有所至

刺詩不可以杜甫爲冠

舉李白唐詩之首

刺詩死於宋

卷十

刺無神鬼怪妖并述異事異物

舉小道可用不必泥異術實有不可爲

祝子罪知錄目錄

終

目錄

祝子罪知錄卷一

吳

王世貞元美校

濟南 李攀龍于鱗閱

舉曰或請于 國家宜廟必犧炎黃與孔子脩祀
說曰凡民既富方穀故庶富而後教何獨遺初功
者

系曰先代亦郡縣通祠三皇乃專于醫亦非

刺曰湯武非聖人

說曰臣不得放弑亂君、子不得放弑頑父、萬物不得傾易、可憾之天地、

演曰夫子書述誓誥武成存其迹也、伯禽秦穆亦存焉、安必盡聖乎、亦非以殷後姬臣而稱存之書、聖賢言事皆錄者、它日亦未始專稱二君聖、二君固賢者過之者也、

又曰二君曷不聖、事不唐虞夏后類也、惡乎賢、賢于劉邦李世民也、迹無殊爾、德賢之也、以迹則莽溫等爾、而劉李且以賢過莽溫諸盜、况二君耶、如

以功則劉李亦何歉于二君耶

又曰孟軻言武王誅一夫紂不爲弑君夫春秋無將矧躬殪而攘之乎無將誅一夫義不並立軻果弗畔仲尼耶或以二君弔伐亦大公耳果若爲公癸辛旣亡胡不取文命之屬若武庚微箕輩爲之乎或又謂微箕雖賢餘固中人固皆弗二君若也弗已若也不之立而自立公也又不然癸辛之前其君固尤弗二君若也二君生是時則固亦不放弑之矣今也癸辛旣亡民弔罪伐已矣餘子猶其

未亡之前何不可立而存其世也舍而自立是本
意不在弔伐與果在弔伐曷爲以義舉而不以義
終之與反復叅察未知攸處或又曰此責二君過
欲全也弔伐旣訖使復繼絕固曰全善然若秉公
自立惡亡善興民受其賜倏然安之而無怨尤焉
亦可爲已夫若是者固爲之卽劉李之爲也今以
二君同科劉李少爲過之固宜病其作俑亂天人
大綱翻以聖稱則惡乎可

系曰約期于牧分禱上下王食無疆王不食言庶

救定宗

周書武寤解孔晁注言當赦其罪人定其

不立曷爲赦
定不食言乎

又曰周車三百五十乘陳于牧野帝辛從武王使
尚父與伯夫致師辛登廩臺自燔于火武王乃手
大白以麾諸侯諸侯畢拜遂揖之武王先入適王
所乃剋射之三發而後下車而擊之以輕呂斬之
以黃鉞折懸之大白適二女之所及旣縊王又射
之三發乃右擊之以輕呂斬之以玄鉞懸諸小白

司克殷解
史記畧同

又曰武王遂征四方凡九十有九馘魔億有十萬
七千七百七十有九俘人三億萬有二百三十武
王在祀大師負商王受懸首白旂妻二首赤旂乃
以先馘入燎于周廟凡武王俘商舊玉億有百萬
同世俘解○按武既以弔伐為主受既死曷為必
戮其軀既以至仁伐至不仁又何俘馘之多至是
昔人固嘗疑之然謂過語則或爾非不血刃也書
固已云血流漂杵若荀卿及後儒皆謂殺者商人
自攻其說不然辨
者皆見于後文

又曰上帝弗顯乃命朕文考曰殪商之多罪紂

同商

誓解○按武王每稱上帝上帝有言乎子曰天何
言哉孟軻謂天不言以行與事示之然則懷逆者

皆得引天以
肆已喙矣

又曰湯將放桀中野士民致于桀曰以薄之君濟

民之賤何必君更

同殷祝解孔注士民言欲與桀
徒避湯○按此言是桀衆亦不

必皆欲
從湯

又曰武王克商遷九鼎于洛邑義士猶或非之

臧哀

伯

又曰湯將伐桀因卞隨而謀卞隨曰非吾事也湯
曰孰可曰吾不知也湯又因瞽光而謀瞽光曰非
吾事也湯曰孰可曰非吾所知也湯遂與伊尹謀

伐桀克之、以讓下、隨下隨辭曰、后之伐桀也、謀乎我、必以我爲賊也、勝桀而讓我、必以我爲貪也、吾生乎亂世、而無道之人、再來漫我以辱行、吾不忍數聞也、乃自投稠水而死、湯又讓瞽光、瞽光辭曰、廢上、非義也、殺民、非仁也、人犯其難、我享其利、非廉也、吾聞之曰、非其義者、不受其祿、無道之世、不踐其土、况尊我乎、吾不忍久見也、乃負石而自沉于廬水、

莊子

又曰、湯放其主、武王殺紂、自是之後、以強凌弱、以

衆暴寡、湯武以來、皆亂人之徒也。

同

又曰湯放其主、武王伐紂、世之所高也、皆以利惑其真而強反其情性、其行乃甚可羞也。

同

又曰湯武爭而王。

同

又曰湯武逆而以順守之。

陸賈

又曰黃生曰、湯武非受命、乃殺也、轅固曰、桀紂荒亂、湯武因天下之心而誅桀紂、桀紂之民弗爲使而歸湯、非受命而何、黃生曰、冠雖敝、必加于首、履雖新、必貫于足、何者、上下之分也、今桀紂雖失道、

然君上也、湯武雖聖、臣下也、人主有失行、臣不正言匡過、以尊天子、反因過而誅之、代立南面、非殺而何、固曰、必若云、是高皇帝代秦、卽天子位、非耶、于是景帝曰、食肉毋食馬肝、未爲不知味也、漢書○按

此景以固理屈、而黃生言妨漢家、故云此以止之、

又曰、世稱紂力能索鐵伸鉤、又稱武王伐之、兵不血刃、夫以索鐵伸鉤之力、當人、則是孟賁夏育之匹也、以不血刃之德、取人、則是三皇五帝之屬也、以索鐵之力、不宜受服、以不血刃之德、不宜賴兵、

今稱紂力、則武王德貶、譽武王、則紂力少、索鐵不
血刃、不得兩立、殷周之稱、不得兩全、則必一非、孔
子曰、紂之不善、不若是之甚也、是以君子惡居下
流、天下之惡皆歸焉、孟子曰、吾于武城、取二三策
耳、以至仁伐至不仁、如何其血之流杵也、若孔子
言、殆沮浮杵、若孟子之言、近不血刃、浮杵過其實、
不血刃亦失其正、一聖一賢共論一紂、輕重殊稱、
多少異實、紂之惡、不若王莽、紂殺比干、莽鴆平帝、
紂以嗣位、莽盜漢位、殺主隆于誅臣、嗣立順于盜

位士衆所畔宜甚于紂漢誅王莽兵頓昆陽死者
萬數兵至漸臺血流沒趾而獨謂周取天下兵不
血刃非其實也

王充

又曰每非湯武在人間不止此事會顯世教所不

容

稽康

又曰湯誥云湯伐桀于鳴條又云湯放桀于南巢
唯有慚德而周書殷祝篇稱桀讓湯王位

云

此

則有異于尚書如周書之所說豈非湯旣勝桀力
制夏人使桀推讓歸王于已蓋欲比迹堯舜襲其

高名者乎又按墨子云湯以天下讓務光而使人
說曰湯欲加惡名于汝務光遂投清冷之泉而死
湯乃卽位無疑然則湯之飾讓僞迹甚多考墨家
所言雅與周書相會夫書之作本出尚書孔父翦
截浮詞裁成雅誥去其鄙事直云慚德豈非欲滅
湯之過增桀之惡者乎

劉知幾

又云夫五經立言千載猶仰而求其前後理甚相
乖何者稱周之盛也則云三分有二商紂爲獨夫
語殷之敗也又云紂有臣億萬人其亡流血漂杵

斯則是非無准向背不同者焉又按武王爲泰誓
數紂過失亦猶近代之有呂相爲晉絕秦陳琳爲
袁檄魏欲加之罪能無辭乎而後來諸子承其僞
說競列紂罪有倍五經故孔子曰桀紂之惡不至
是君子惡居下流班生亦云安有據婦人于朝劉
向又曰世人有弑父害君桀紂不至是而天下惡
者皆以桀紂爲先此其自古言辛癸之罪將非厚
誣者乎

同

又曰高定七歲讀尚書至湯誓問父郢曰奈何以

臣伐君父曰應天順人何云爲伐又問曰用命賞于祖不用命戮于社豈是順人乎郢不能答

唐語林又

唐書○按此雖幼悟亦卽民之秉彝也

又曰元結爲二風詩或訂曰頌善不及湯武焉可稱帝王理亂之道對曰云云如湯武之德吾則不敢頌爲規法

元結

又曰殷之亡武王周公率天下之賢士與天下之諸侯而往攻之未嘗聞有非之者也伯夷叔齊乃獨以爲不可微二子亂臣賊子接迹于後世矣

韓愈

又曰湯放桀、有慙德、恐來世以爲口實、孔子謂武未盡善、而孟子固與之、其心安在乎、

李觀

又曰孟子謂盡信書則不如無書、仁人無敵于天下、以至仁伐至不仁、而何其血之流杵也、紂一人之惡耶、衆人之惡耶、衆皆善而紂獨惡、則去紂久矣、不待周也、夫爲天下逋逃主萃淵藪、同之者可遽數耶、紂存則逋逃者存、紂亡則逋逃者曷歸乎、其欲拒周者、又可數耶、血流漂杵、未足多也、或曰前徒倒戈、攻于後、以訖、故荀卿曰、殺者皆商人、非

周人也、然則商人之不拒周審矣、曰如皆北也、焉

用攻、

同

又曰武王非聖人也、昔者孔子蓋嘗罪湯武、顧自以爲殷之子孫、而周人也、故不敢、然數致意焉、大哉巍巍乎堯舜也、禹吾無間然、其不足于湯武也亦明矣、曰武盡美矣、未盡善也、又曰三分天下有其二、以服事殷、周之德可謂至德也已矣、伯夷叔齊之于武王也、蓋謂之弑君、至不食其粟、而孔子與之、其罪武王也甚矣、此孔氏之家法也、世之君

子苟自孔氏必守此法、國之存亡、民之死生、將于是乎在、其孰敢不嚴、而孟子始曰、吾聞武王誅獨夫紂、未聞弑君也、自是學者以湯武爲聖人、若當然者、皆孔氏之罪人也、使當時有良史如董狐者、南巢之事、必以叛書、牧野之事、必以弑書、而湯武仁人也、必將爲法受惡、周公作無逸曰、殷王中宗、及高宗祖甲、及我周文王、茲四人啟迪、上不及湯、下不及武王、亦以是哉、文王之時、諸侯不求而自至、是以受命稱王、行天子之事、周之王不王、不計

紂之存亡也使文王在、必不伐紂、紂不見伐而以
考終、或死于亂、殷人立君而事周、命爲二王、後以
祀殷君、臣之道、豈不兩全也哉、武王觀兵于孟津
而歸、紂若不改過、則殷人改立君、武王之待殷、若
是而已矣、天下無王、有聖人出而天下歸之、聖人
所不得辭也、而以兵取之、而殺之、而放之、可乎、殺
其父、封其子、非其人也、則可、使其子而果人也、則
必死之、武王親以黃鉞斬紂、使武庚受封而不叛、
豈復人也哉、武庚之必叛、不待智者而後知也、武

王之封武庚蓋不得已焉耳殷有天下六百年賢
聖之君六七作紂雖無道其故家遺俗未盡滅也
三分天下有其二殷不伐周而周伐之誅其君夷
其社稷諸侯必有不悅者故封武庚以慰之此豈
武王之意哉故曰武王非聖人也

蘇軾

又曰孔子謂武未盡善則伯夷之義豈可廢哉宋
昭公以無道弑春秋雖書宋人弑其君然晉荀林
父衛孔達陳公孫寧鄭石楚伐宋以不討賊稱人
晉靈公爲之會諸侯于扈以不討賊不敘明君臣

之義不以無道而廢之也

蘇轍

又曰湯武非聖君放桀于南巢惟有慙德曰予恐
來世以爲口實夷齊扣馬而諫曰父死不葬爰及
干戈可謂孝乎以臣弑君可謂忠乎此湯武之罪
也夫君天也父也元首也天不常雨澤而旱潦爲
下土者傾而陷之可乎父不理生產而博飲爲子
孫者醜而戕之可乎頭目昏重一身之累爲腹心
股肱者謀而易置之可乎其不可也必矣湯武之
罪當無所逃彼其自恕與天下後世恕之者不過

曰誅一殘賊而拯億兆于塗炭行大義者不恤小節與大利者不顧小害是又弗思甚也爲湯武者能保其子孫皆賢明仁聖否乎如身後之不可必蓋亦姑忍是而冀其將來可矣何遽爲禍首以啓天下無君無父之心使殃毒之流紛紛如也蜂蟻之有君其羣不敢攘而代之分素定也使湯武不爲亂臣賊子倡未必後世敢兆是亂也夏書成湯放桀于南巢唯有慙德使湯禽獸也則安而有之若猶人也惡得不慙也齊魯周而餓死君子曰義

士則不義之名將有歸矣若曰應天順人湯武豈
得已哉此書生所知也愚夫細民且不曉此特以
根夫細民心者爲是說

鄭厚

又曰湯武之事古人言之多矣惟轅固黃生爭辯
甚詳顏師古之言湯武爲殺是背經義故以馬肝
爲喻也東坡志林武王非聖人云云可謂至論然
予竊考孔子之敘書明言伊尹教湯伐桀成湯放
桀于南巢武王伐商武王勝商殺紂各蔽以一語
而大義皦如所謂六藝折衷無待于良史復書也

洪邁

又曰武王九十歲時、方興弔伐之師、呂望仗黃鉞、
斬妲己、亦踰八望九矣、君臣各已老成、作此不韙
之事、恐勢使然耳、李泰伯不喜孟子、謂孔子教人
尊王、孟子教人爲王、云云、豈當如此、使人爲不道、
故前輩謂孟子非賢人、宜乎盱江終身不讀也、韓
文公作伯夷頌、無一語及武王、末云微二子、亂臣
賊子、接迹于後世矣、其罪武王、如刀鋸斧鉞之加、
凜然可畏、

顧文薦

又曰孔子罪湯武之意深矣曰唯有慙德曰盡美未盡善也伊尹相湯者也無一辭及之夷齊非武王者也則屢稱之序湯誓曰伊尹相湯伐桀敘仲虺之誥曰成湯放桀序泰誓曰武王伐殷序洪範曰武王勝殷敘紂其罪湯武也甚矣但書法謹嚴語意含蓄讀者未知其爲罪之之辭漢黃生曰桀紂君也湯武臣也君有失臣不正言而伐代之唐陸淳曰太公殷臣紂暴不諫反佐周傾之聖人宗堯舜賢夷齊不贊伊尹者爲此也此說正夫子之

本旨惜當時諸儒見不及此故言以人廢韓文公
伯夷頌雖甚激揚然終不敢斥言武王至東坡武
王論出而後夫子之深意始大暴白于天下後世
然謂當時有良史如董狐則南巢之事必以叛書
牧野之事必以弑書是又未究聖人之書法也蓋
叛者忘義而背其君者也弑者陰謀而賊其君者
也叛與弑君臣之義雖絕君臣之分猶存至于湯
武直以勢強力敵倡率天下以兵臨之視夏殷爲
與國桀紂猶匹夫伐之放之殺之夷然不顧畧無

君臣之分矣。故書序曰：伐曰勝，曰放，曰殺。其罪過于叛與弑矣。

俞文豹

又曰：韓伯夷頌無一辭及武王。末云：微二子，亂臣賊子，接迹于後世矣。其罪武王凜然如刀鋸斧鉞之加，而鋒鏖不露，所謂法度森嚴也。

同

又曰：胡安國云：兵家勝負在人主曲直。紂師如林，武王數其不事宗廟，賊虐諫輔之罪，則商曲而周直。故周勝。俞文豹謂：以罪則紂曲，以義則商直。三分天下有其二，商不伐周而周伐之，固得爲直乎。

商之民所以倒戈以紂暴虐不肯用命耳非師曲也

同

又曰臧哀伯所云武王剋商義士非之義士卽多士所謂殷遷頑民者也由周而言則爲頑民由商而論則爲義士矣此說陳同甫始發之杜預謂伯夷之屬非也

同

刺曰伊尹不臣不可謂之聖賢

說曰事與湯同

系曰唐虞以揖遜得天下而猶用和仲稷契以厚

風俗成湯放桀而有天下、揖遜已異、淳朴大壞、伊尹放太甲、子太甲而臣下如權矣、乃曰耻君不及堯舜、夫伊尹不耻其身之不和仲稷契而耻其君不堯舜、致君之誠則無矣、顧厲已之事何如哉、隱羅又曰伊尹非純臣也、非經行也、不可爲後世法也、跖犬吠堯、各護其主、臣無貳心、天之致也、伊尹去湯就桀、醜桀歸湯、去就之險迹同姦謀、使兵家得引爲反間、伊尹自取之也、桐宮之放與夷羿唯阿耳、此豈人臣所當爲者哉、是以效伊尹而不得盡

其心者爲霍光、效霍光而不得盡其心者爲王莽、董卓、曹氏代漢、劉裕代晉、司馬代魏、紛紛至于五代、未嘗不托迹伊周以階亂、故曰伊尹非純臣也、非經行也、不可爲後世法也、萬章曰、賢者之爲人臣也、其君不賢則固可放與、鄭厚

又曰、佐湯伐桀者伊尹也、佐武王伐紂者太公也、孔子序湯誓曰、伊尹相湯伐桀、升自陬、至序、洪範則曰、武王勝殷、殺紂而不及太公何也、蓋湯以前未有伐君之事、湯亦未敢遽爲此舉、自伊尹五就

桀也、覘其國、觀其政、知桀爲可伐、知阬爲間道、可
以出其不意、乃導湯爲之、湯旣非本心、所以有慙
德、若武王則援成湯之例、挾諸侯之力、奮意而行
之不待太公之謀也、

俞文豹

又曰東坡書說云、湯與桀敵國也、伊尹往來其間、
皆聞其政、而兩國不疑、則尹聖人也、其道大矣、文
豹謂伊尹乃桀之叛臣、湯之謀臣也、負鼎而干湯、
往返而五就、相湯而伐君、間道而出師、放君而居
攝、皆非人臣之正道、若在春秋時、則爲權謀矣、故

夫子未嘗一言及之。獨于序書曰：伊尹相湯伐桀。又曰：伊尹放諸桐。曰：相曰放罪之也。深矣。孟子以爲聖而等之伯夷，已非孔子之意。況許以聖人乎？若湯則聖人也。以臣伐君，逆知來世必以爲口實。及武王伐紂，果曰夏桀弗克。若天，天乃佑命。成湯降黜夏命。又曰：我伐用張，于湯有光。至周公又曰：天乃命爾祖成湯，革夏。又曰：乃天降顯休命于成湯，刑殄有夏，則湯之言驗矣。然湯止于放桀，武王乃殺紂。

俞文豹

又曰孟軻要說諸侯必以湯武之事是其所以自處者非伊尹不爲其言曰仲尼之徒無道桓文之事又曰管仲曾西之所不爲而所言者必伊尹予則曰仲尼之徒有道桓文管仲而無道伊尹予非異于聖人聖人之意則然也何則孔子于管仲未嘗不愛之也所惡其小器者特以三歸反坫之事累大德爾至稱有桓之功尤合諸侯不以兵車則斷以爲管仲之力而至以其仁許之如其言管仲伯諸侯相桓公一匡天下民至于今受其賜微管

仲吾其被髮左衽矣豈若匹夫匹婦之爲諒也其稱管仲如此而未嘗一言以及伊尹伊尹之事不爲揄也或曰論語雖不及之而書固已取之矣聖人非不稱之曰不然書者史而已有其事而可鑒則宜著之非有議也而論語則聖人譏評折衷之書也學爲君子者必於此乎取之矣

羅泌

又曰天問云緣鵠飾玉后帝是饗王逸注言伊尹始仕因割烹鵠鳥之羹修玉鼎以事湯湯遂以爲相劉孝標西山志云負玉鼎而要卿相

姚寬

又曰孟子序三聖王安石有矯弊之說蘇子由不以爲然曰孔子嘗言此三人矣或謂之仁人或謂之賢人未聞以聖人而許之者

陳善

又曰昔人心術行事不易知也如伊尹謂不以堯舜之道事君治民是賊君民也而佐湯伐桀其前後不同如此

許衡

刺曰孟軻縱橫者流不可謂賢人

說曰軻去孔子近諸子緒餘軻遊獵其間得之而其資黠其口給因挾孔以騰類干時欺世其行躁

妄一志聲利、覲冒求用、謀既弗售、因語進退節
義留書復欺後世、後世果爲之欺、墮三千、今卽其
中時自矛盾、不可勝舉、露形態、可駭笑、曩昔賢智
多能照而斥之、類中其隱我

太祖高皇帝亦嘗病之、命儒臣節其書以教人、序言
所去者、士不業習、試不命題、而今其書列學宮、身
配聖祀、禮遵

國制、安敢輒斥、謹述所聞前人成語一二千篇、略其
大旨如上、未稍申評之、皆舊聞之意也

凡後所述
亦點據其

決然明著、切于其身、與其言害道之大者爾、凡辨其言之非、與夫他集中汗漫者、皆未可盡、

系曰畧法先王而不知其統、猶然而材劇志大、聞見雜博、案舊造說、謂之五行、甚僻違而無類、幽顯而無說、閉約而無解、注飾其辭而祇敬之曰、此真先君子之言也、子思倡之、孟軻和之、世俗之講、猶贅儒囁囁然、不知其所非也、遂受而傳之、以爲仲尼子游爲茲厚于後世、是則子思孟軻之罪也、荀卿又曰、孟子有云、天下之民舉安、王庶幾改諸、予曰、望諸、孟子所去之王、豈前所不朝之王哉、如是何

其前輕之疾而後重之甚也。如非是前王前不去而後復去之，是後王不肯。河而去三日宿于前不甚不朝而宿于景丑，何孟子之操。前後不同所以爲王終始不一也。且孟子在魯魯平公欲見之，嬖人臧倉毀孟子止平公，樂正子以告曰行或使之止，或尼之行，止非人所能也。予之不過魯侯，天也。前不過于魯，後不過于齊，無以異也。前歸之天，今則歸之于王。孟子論稱竟何定哉。夫不行于齊王不用，則若臧倉之徒毀讒之也。此亦止或

尼之也、皆天命不遇、非人所能也、去何以不徑行、而留三宿乎、天命不當遇于齊、王不用其言、大豈爲三日之間、易命使之遇乎、在魯則歸之于天、絕意無與、在齊則歸之于王、庶幾有改、夫如是不遇之議、一在人也、或曰、初去未可以定天命也、與三日之間、王復追之、天命或時在三日之間、故可也、夫如是、齊王初使之去者、非天命乎、如使天命在三日之間、魯平公比及三日、亦時棄臧倉之議、更用樂正子之言、往見孟子、孟子歸于天、何其早乎、

如三日之間公見孟子孟子奈前言乎孟子去齊
充虞塗問曰夫子若有不豫色然前日虞聞諸夫
子曰君子不怨天不尤人曰彼一時此一時也五
百年必有王者興其間必有名世者由周而來七
百有餘歲矣以其數則過矣以其時考之則可矣
夫天未欲平治天下乎如欲平治天下當今之世
舍我而誰也吾何爲不豫哉夫孟子言五百年有
王者興何以見乎帝嚳王者而堯又王天下堯傳
于舜舜又王天下舜傳于禹禹又王天下四聖之

王天下也、繼踵而興、禹至湯且千歲、至周亦然、始
于文王、而卒傳于武王、武王崩、成王幼、周公共治
天下、由周至孟子之時、又七百歲、而無王者、五百
年必有王者之驗、在何世乎、云五百歲必有王者、
誰所言乎、論不實事、考驗信浮淫之語、不遇去齊、
有不豫之色、非孟子之言效、與俗儒無殊之驗也、
五百年者、以爲天出聖期也、又言以天未欲平治
天下也、其意以爲天欲平治天下、當以五百年之
間、生聖王也、如孟子之言、是謂天故生聖人也、然

則五百歲者、天生聖人之期乎、如是其期、天何不
生聖、聖王非其期、故不生、孟子猶信之、孟子不知
天也、自周以來、七百餘歲矣、以其數則過矣、以其
時考之則可矣、何謂數過、何謂可乎、數則時、時則
數矣、數過之、五百年也、從周到今、七百餘歲、踰二
百歲矣、設或王者生、失時矣、又言時可何也、云五
百年必有王者興、又言其間必有名世者、與王者
同乎異也、如同爲再言之、如異名世者、謂何等也、
謂孔子之徒、孟子之輩、教授後生、覺悟頑愚乎、已

有孔子已又已生矣、如謂聖臣乎、當與聖王同時、
聖王出、聖臣見矣、言五百年而已、何爲言其間、如
不謂五百年、如謂其中間乎、是謂二三百年之時
也、聖不與五百年時、聖王相得、夫如是、孟子言其
間必有名世者、竟謂誰也、夫天未欲平治天下也、
如欲平治天下、舍予而誰也、言若此者、不自謂當
爲王者、有王者、若爲王臣矣、爲王者、臣皆天也已、
命不當平治天下、不浩然安之于齊、懷恨有不豫
之色、失之矣、

王充

又曰沈同以其私問伐燕云云、或問勸齊伐燕云云、夫或問孟子勸齊伐燕不誠是乎、沈同之問此挾私意欲自伐之也、知其意慊于是、宜曰、燕雖可伐、須爲天吏則可、沈同意絕則無伐燕之計矣、不知有此私意而徑應之、不省其語、是不知言也、公孫丑曰、夫子惡乎長、孟子曰、我知言、又問何謂知言、曰、誑辭、知其所蔽、淫辭、知其所陷、邪辭、知其所離、遁辭、知其所窮、生于其心、害于其政、發于其政、害于其事、孟子、知言者也、又知言之所起之禍、其

極所致之福見彼之間則當知其指辭所欲之義
知其所之則知其極所當害矣同

又曰孟子謂盡更有人于此毀瓦畫墁其志將以
求食也則子食之乎曰否曰然則子非食志也食
功也夫孟子引毀瓦畫墁者欲以詰盡更之言也
知毀瓦畫墁無功而有害盡更必不食也雖然引
毀瓦畫墁非所以詰盡更也何則詰志欲求食者
毀瓦畫墁者不在其中不在其中則難以詰人矣
夫人無故毀瓦畫墁此不癡狂必遨戲也癡狂不

求食、遨戲、亦不求食。求食者皆多人所不得利之事，以作此鬻于市，得賈以歸，乃得食焉。今毀瓦畫墁，無利于人，何志之有？有知之人，知其無利，固不爲也。無知之人，與癡狂比，固無其志。夫毀瓦畫墁，猶比童擊壤，巨人博戲，至于投石超距之類，其志有求食者乎？然則孟子之詰盡更也，未爲盡之也。如盡更以孟子之言，可謂禦人以口給矣。同

又曰：孔子曰：「三分天下有其二，以服事殷，周之德，其可謂至德也已矣。」又曰：「有君民之大德，有事君

之小心書序伊尹既醜有夏復歸于亳孟子亦曰
五就湯五就桀者伊尹也夫周顯王未聞有惡行
特徵弱耳非紂也而齊梁不事之非桀也而孟子
不就之嗚呼孟子之然爲佐命何其躁也

李觀

又曰樂則韶舞放鄭聲遠佞人鄭聲淫佞人殆鄭
聲之害與佞人等而孟子曰今樂猶古樂何也使
孟子爲政豈能存鄭聲而不去之哉其曰今樂猶
古樂特因王之所悅而入其言耳非獨此也好色
好貨好勇是諸侯之三疾也而孟子皆曰無害從

吾之說百姓唯恐王之不好也。譬之于醫，以藥之不可口也，而以其所嗜爲藥，可乎？使聲色與貨，而可以王，則利亦可以進仁義。何獨拒梁王之深乎？此豈非失其本心也哉？同

又曰：蘇子瞻云，予爲論語說，與孟子辨者八：堯傳之舜，舜傳之禹，禹傳之湯，湯傳之文武，周公文武周公傳之孔子，孔子傳之孟軻。軻之死，不得其傳焉。何如？曰：孔子死，不得其傳矣。彼孟子者，名學孔子而實背之者也。焉能傳？敢問何謂也？曰：孔子之

道君君臣臣也。孟子之道人皆可以爲君也。天下無王霸言僞而辯者不殺諸子得以行其志。孫吳之智。蘇張之詐。孟子之仁義其原不同。其所以亂天下一也。同

又曰孟子曰五霸者三王之罪人也。吾以爲孟子者五霸之罪人也。五霸率諸侯事天子。孟子勸諸侯爲天子。苟有人性者必知其逆順耳矣。孟子當周顯王時其後尚且百年而秦併之。嗚呼。孟子忍人也。其視周室如無有也。孔子稱桓公九合諸侯。

不以兵車管仲之力也如其仁如其仁又曰管仲相桓公霸諸侯一匡天下民到于今受其賜微管仲吾其被髮左衽矣而孟子謂之王齊猶反手也功烈如彼其卑故曰管仲曾西之所不爲嗚呼是猶見人之救鬪者而笑曰胡不因而殺之貨可得也雖然桓公管仲之于周救父祖也而孟子非之奈何同

又曰或云然則武王不可爲與曰湯武不得已也由孟子之言則是湯武脩仁行義以取桀紂耳嗚

呼、吾乃不知仁義之篡器也。同

又曰然則仁義無益于人者乎曰奚其爲無益也
天子用之以保其天下、諸侯用之以保其社稷、卿
大夫用之以保其宗廟、士用之以保其祿位、庶人
用之以保其田里、使君臣上下父子兄弟夫婦相
愛相恭、相止相敬、厭然如宮商之應、如鐘繪之次、
禍亂日以消、名譽益以廣、奚其爲無益也、若夫挾
欲趨利、圖謀非分、豈仁義之具哉、乃孟子之邪言、
陷人于逆惡也、或曰孟子與諸侯言、奚不聽也、謂

其迂濶者乎曰迂濶有之矣亦足殫也孟子位諸侯則能以取天下矣位卿大夫豈不能取一國哉爲其君者不亦難乎然滕文公嘗行孟子之道矣故許行陳相稱之曰仁政曰聖人也其後寂寂不聞滕侯之得天下也孟子之言故無驗也

同

又曰孟子之心以天下積亂已久諸侯皆欲自爲雖苟說之以臣事周孰能喜也故揭仁義之竿而湯武爲之餌幸其遂售以拯斯民而已矣曰孟子不肯枉尺直尋謂以順爲正者妾婦之道其肯屑

就之如此乎。夫仁義又豈速售之物也。子噲不得與人燕子之不得受燕子噲固知有周室矣。天之所廢必若桀紂。周室其爲桀紂乎。盛之有衰若循環然。聖王之後不能無昏亂。尚賴臣子扶救之耳。天下之地方百里者有幾。家家可以行仁義。人人可以爲湯武。則六尺之孤可托者誰乎。孟子自以爲好仁。吾知其不仁甚矣。同

又曰齊王欲見孟子而稱有疾。明日出弔。王使人問疾。醫來。孟仲子請必無歸而造于朝。不得已而

之景丑氏宿焉。孔子君命召，不俟駕行矣。則曰：孔子當仕有官職，夫孟子爲齊卿，無官職耶？天下有達尊三：爵一，齒一，德一。惡得有其一以慢其二者哉？孔子德薄且齒少耶？君之所不臣者二：當其爲尸，則弗臣也；當其爲師，則弗臣也。講道之頃耳，匪常然也。人君尊賢，其臣尙當辭矧可以要之也哉？是孟子之驕習乎？宜乎其教諸侯以反天子也。同又曰：孟子云：紂之去武丁未久也，其故家遺俗，流風善政，猶有存者。又有微子、微仲、王子比干、箕子

膠鬲皆賢人也、相與輔相之、故久而後失之也、尺地莫非其有也、一民莫非其臣也、然而文王猶方百里起、是以難也、齊人有言曰、雖有智慧、不如乘勢、雖有鎡基、不如待時、今時則易然也、今之學者曰、自天子至於庶人、皆得以行王道、孟子勸諸侯行王道、非取王位、應之曰、行王道而已乎、則何必紂之失也、何憂乎善政之存、何畏乎賢人之輔、尺地一民皆紂之有、何害諸侯之行道哉、同

又曰、齊宣王問曰、人皆謂我毀明堂、毀諸已乎、孟

子對曰、夫明堂者、王者之堂也、王欲行王政、則勿毀之矣、行王政而居明堂、非取王位而何也、君親無將、不容纖芥于其間、而學者紛紛強爲之辨、又謂孟子權以誘諸侯、使進于仁義、仁義達則尊親、周室自復矣、應之曰、言仁義而不言王、彼悅之而行仁義、固知尊周矣、言仁義之可王、彼悅之則假仁義以圖王、唯恐得之之晚矣、尙何周室之顧哉、嗚呼、今之學者、雷同甚矣、是孟子而非六經、樂王道而忘天子、吾以爲天下無孟子可矣、不可以無

六經無王道可矣、不可以無天子、故作常語、以正君臣之義、以明孔子之道、以防患亂于後世耳、人知之爲我利、人不知非我害、悼學者之迷惑、聊復有言、同

又曰、孟子曉然合于孔子者、常語不得不進之、而謂湯之天下久則難變、故文王未洽于天下、齊有廣地、行仁政而王、莫之能禦、由周而來、數則過時、則可、當今舍我其誰、是教諸侯以仁政、叛天子者也、欲爲佐命者也、常語不得不絕之矣、天子固不

可叛也。六經亦不可叛也。苟不叛之，則視孟之書，猶寇兵虎翼者也。蓋既倡之，學者和之。劉歆以詩書助王莽，荀彧說曹操以王霸，乃孟子一體耳。使後世之君率不悅儒者，以此常語之作，傷昔之人以其言叛天子。今之人又以其言叛六經，故曰天下可無孟子，不可無六經；可無王道，不可無天子，是大有功于名教，非苟言焉。

陳次公述常語

又曰：孟子將朝王云云。疑曰：孔子，聖人也，定哀庸君也。然定哀召孔子，孔子不俟駕而行，過位，色勃

如也、足、躩如也、過虛位且不敢不恭、况召之、有不
往而他適者乎、孟子學孔子者也、其道豈異乎、夫
君臣之義、人之大倫也、孟子之德、孰與周公、其齒
之長、孰與周公之于成王、成王幼、周公負之以朝
諸侯、及長而歸政、北面稽首畏事之、與事文武無
異也、豈得云彼有爵、我有德、齒可慢彼哉、司馬光

又曰、孟子謂蚍蜉居其位、不可以不言、言而不用、
不可以不去、已無官守、無言責、進退可以存餘裕、
疑曰、孟子居齊、齊王師之、夫師者、導人以善而機

其惡者也、豈得謂之無官守、無言責乎、若謂之爲
貧而仕耶、則後車數十乘、從者數百人、仰食于齊、
非抱關擊柝之比也、詩云、彼君子兮、不素餐兮、夫
賢者所爲、百世之法也、余懼後之人、挾其有以
其君、無所事而貪祿位者、皆援孟子以自況也、
又曰、孟子云、伯夷隘、柳下惠不恭、隘與不恭、君子
不由也、疑曰、孟子稱所願學者孔子、然則君子之
行、孰先于孔子、孔子歷聘七十餘國、皆以道不合
而去、豈非非其君不事乎、孺悲欲見孔子、孔子辭

以疾、豈非非其友不友乎、陽貨爲政于魯、孔子不肯仕、豈非不立于惡人之朝乎、爲定哀之臣、豈非不羞污君乎、爲委吏爲乘田、豈非不卑小官乎、舉世莫知之、不怨天不尤人、豈非遺佚而不怨乎、飲水曲肱、樂在其中、豈非阨窮而不憫乎、居鄉黨恂恂似不能言、豈非由由與之偕而不自失乎、是故君子邦有道則見、邦無道則隱、事其大夫之賢者、友其士之仁者、非隘也、和而不同、遯世無悶、非不恭也、苟無失其中、雖孔子由之、得云君子不由

也。同

又曰齊宣王問卿云云。疑曰禮君不與同生同車嫌其偏也。爲卿者無貴戚異姓皆人臣。臣之義諫于君而不聽去之可也。死之可也。若之何其以貴戚之故敢易位而處也。孟子之言過矣。君有大過無若紂。紂之卿士莫若王子比干箕子微子之親且貴也。微子去之。箕子爲之奴。比干諫而死。孔子曰商有三仁焉。夫以紂之過大而三子之賢猶且不敢易位也。况過不如紂而賢不及三子者。

乎必也使後世有貴戚之臣諫其君而不聽遂廢而代之曰吾用孟子之言非篡也義也其可乎或曰孟子之志欲以懼齊王也是又不然齊王若聞孟子之言而懼則將愈惡忌其貴戚聞諫而誅之貴戚聞孟子之言又將起而蹈之則孟子之言不足以格驕君之非而適足以爲篡亂之資也其可乎同

又曰孟子云所就三所去三云云疑曰君子之仕行其道也非爲禮貌與飲食也昔伊尹去湯就桀

桀豈能迎之以禮哉。孔子栖栖遑遑，周遊天下，佛
盼召欲往，公山弗擾召欲往，彼豈爲禮貌與飲食
哉。急于行道也。今孟子之言曰：雖未行其言也，迎
之有禮則就之，禮貌衰則去之，是爲禮貌而仕也。
又曰：朝不食，夕不食，君曰：吾大者不能行其道，又
不能從其言也，使饑餓于吾土地，吾耻之。周之亦
可受，是爲飲食而仕也。必如是，是不免于粥先王
之道，以售其身也。古之君子之仕也，殆不如此。同
又曰：沈同問燕云云，疑曰：孟子知燕之可伐而必

待能行王政者乃可伐之齊無仁政伐燕非其任也。使齊之君臣不謀于孟子孟子勿豫知可也。沈同既以孟子之言勸王伐燕孟子之言尚有懷而未盡者安得不告王而止之哉。軍旅大事也民之死生國之存亡皆係焉苟動而不得其宜則民殘而國危仁者何忍坐視其繆妄乎。同

又曰告子云性之無分于善不善猶水之無分于東西此告子之言失也。水之無分于東西謂平地也。使其地東高而西下西高而東下豈決導所能

喻性何
於白外

致乎性之無分于善不善謂中人也。瞽瞍生舜舜生商均豈陶染所能變乎。孟子云人無有不善此孟子之言失也。丹朱商均自幼及長所見者堯舜也不能移其惡豈人之情無不善乎。同

又曰孟子云白羽之白猶白雪之白白雪之白猶白玉之白告子當應之曰色則同也性則殊矣羽性輕雪性弱玉性堅而告子亦皆然之此所以來犬牛人之難也孟子亦可謂以辨勝人矣

又曰書放勳乃殂落云云孟軻不達此言乃妄稱

孔子言、舜既爲天子、又爲堯三年喪畢、避其子、然後卽位云云、孟子排楊墨、可謂醇矣、其餘論經義、談世事之謀、往往乖戾、陋儒愛其詞、雜然崇尚、可鄙笑也。劉恕

又曰、臣聞學者之于孔子、當一而不一、是以明王罷黜百家、表章六經、大儒推明孔氏、拔出百氏、今設科以孟子配六經、視古之黜百家而專師孔氏、六經者、不亦異乎、前者學宮罷黜孔子、春秋而表章、僞雜之周禮、以孟子配乎孔子、而學者發言、折

束于孟子而畧乎論語固可哂矣今皇太子初

就外傳而命宮僚講孝經讀孟子蓋孟子不當先

諸論語者也如其先之豈所以輔導令質而使之

一德哉晁說之

又曰王充有刺孟馮休著刪孟充言出論衡韓退

之贊爲閉門潛思論衡以修矣則退之于醇乎醇

之論亦或不然也邵伯溫

又曰王子韶未知名時謁一達官方與人談孟子

王竊哂之其人顧問曰曾讀孟否曰素愛之第全

不曉其義、問何義、曰從頭不曉、曰試言之、曰孟子見梁惠王、卽不曉其人、深訝曰、此有何奧義、王曰、旣云孟子不見諸侯、何以見梁惠王、其人愕然無對、沈括

又曰孟軻非賢人也、夫春秋書王、以存周也、孔子曰、如有用我者、吾其爲東周乎、此仲尼之本心也、孟軻非周民乎、履周之地、食周之粟、常有無周之心、學仲尼而叛之者也、周德之不競、亦已久矣、然其虛位猶拱而存也、使當時有能倡桓文之舉、則

文武成康之道業庸可幾乎爲軻者徒以口舌求合自媒利祿蓋亦使務是而已乎奈何今日說梁惠明日說齊宣說梁襄說滕文皆啗之使爲湯武之爲此軻之賊心也譬父病亟使非商臣爲子未有不望其生者如之何而直置之不救之地哉軻忍人也辯士也儀秦之雄也其資薄其性慧其行輕其說如流其應如響豈君子長者之言也其自免于蘇張范蔡申韓商李之黨者挾仲尼以欺天下也使數子者皆拂其素矯其習竊仁義兩字以

藉口、是亦孟軻而已矣、要之戰國縱橫捭闔之士、
皆發冢之人、而軻能以詩禮也、是故孟軻誦仁義、
猶老錄公之誦法也、老錄公誦法、賣法者也、軻誦
仁義、賣仁義者也、安得爲仲尼之徒與、嗟乎、孔子
生而周尊、孟軻生而周絕、何世人一視孔孟之心、
記曰、擬人必于其倫、寧從漢曰孔墨、鄭厚

又曰、京師坐鬻者、愚遠方之人、直百必索千、酬之
當其直、則售、意其知價也、知價不可復愚、酬之過
其直、則不售、意其不知價也、不知價、則惟吾之愚、

必極其所索而後售。孟軻抱縱橫之具，飾以仁義，行鬻于齊。齊王酬之以萬鍾，且曰：「我欲中國而授孟子室，養弟子以萬鍾，軻意齊王不知價者。」遂愚齊王，求極所索而後售。齊王徐而思之，軻之言曰：「王如用予，則齊王猶反手，開闢以來，初無是理。悔而不酬，軻亦覺齊王之稍覺也。卷而不售，祀以之他。徐而自思曰：『齊王之酬我，過其直矣。矯然不售，行將安鬻？遲遲吾行，三宿出晝，冀齊王呼已而還。其舊直是市井販夫行鬻魚鹽果菜之態也。京師

坐齋猶有體焉、小兒方啼而怒、進以飯、推而不就、徐其怒、歇而饑也、睨睨然望人進之、輒之去、齋留齊兒態也夫、同

又曰、予讀韓愈書、知其尊聖人之道、其志篤矣、然謂孟軻輔聖明道之功、不在禹下、斯亦過矣、得非美其流而忘其源乎、當堯之時、洪水浸天下、民受其害深矣、雖堯舜之咨嗟遑遑、未有以治之道、禹乃決橫流而放于海、粒斯民而奠厥居、是天下之水、非禹不能去、昭昭然矣、雖百變絜、又何益哉、孔

子之道衣被天地、陶甄日月、萬類之性、人倫之本、孰不由其德而能存乎？苟一日失之，則鳥獸之不如也。當周之亡，辯詐暴橫，聖人之道偶不行于一時，亦猶天地之晦、日月之蝕，運之常也。復何傷乎？孟軻學聖人者也，憤然而興，闢楊墨、誅叛義以尊周公孔子，信有大功于世。然聖人之道無可無不，可苟當時軻之徒不能排楊墨、橫遏異端、明仁義以訓天下，則聖人之教果從而廢乎？且使聖人之道遭楊墨之害而遂衰微，則亦一家之小說爾。又

焉足爲萬世之法哉、軻雖欲張大其教、天下可從而興乎、是聖人之道、不爲一人而廢、一人而興、又昭昭然矣、其後嬴政肆虐、火其書、窒其途、以愚天下之耳目、使不能通其說、其爲害過楊墨遠矣、然漢家之興、則孔氏之言、雷震于海內、豈復由軻之辨而後行耶、故曰、譽之不足益、毀之不足損、由其道大也、後之儒者、有能立言著書、振揚其風、發明其旨、則可矣、若曰、隨其廢而興之、因其塞而通之、得非過矣乎、予謂楊墨之禍、未若洪水、然而九年

之害、非禹不能平、孔氏之道、雖見侵毀、亦不由軻而益尊、苟毀譽由軻而興、則不足謂之孔氏之道、使聖人復生、必不易此言也、張俞論韓愈稱孟子功不在禹下

又曰、孔子作春秋、于吳楚越之君、止稱曰子、未嘗王之、孟子于齊梁之君、則偃然稱之、此時孟子亦不知有周王矣、俞文豹

又曰、齊宣王問湯放桀、武王伐紂、臣弑其君可乎、或者宣王見周室微弱、有問鼎之心、故設爲是問、孟子而有尊王之心、欲引其君以當道而爲湯武

之地則當託以應天順人之說而乃曰賊仁者謂之賊賊義者謂之殘殘賊之人謂之匹夫吾聞誅獨夫紂未聞弑君也故前輩謂湯武非聖人伊呂非賢臣孟子非賢人

同

又曰張敬夫云孔門待紂甚忠厚孟子則以一夫名紂既燔死武王復親斬之紂君也武王嘗北面事之忍爲之乎使孟子當其時必爲誅紂之事矣

同 孟子利孟勇不有見位置元王受立孟子下堂非邪說

又曰韓愈尊孟子謂觀聖道必由之始孟子距楊

墨而韓則謂孔子必用墨子不相用不足爲孔墨
同

又曰孟子旣以夷惠爲聖人王安石復以孟爲聖
人雖欲推尊非至論也

陳善

又曰父雖不父子不可以不子君雖不君臣不可
以不臣而孟子曰君之視臣如犬馬則臣視君如
國人君之視臣如土芥則臣視君如寇讐孔子曰
君使臣以禮臣事君以忠又曰不可則止又曰邦
無道則可卷而懷之何至以犬馬自爲乎

陳善又
俞文豹

又曰孟子嘗謂執中無權猶執一也然臨事亦有
執而不通處如曰可使制梃以撻秦楚之堅甲利
兵蓋謂德義之尊足以無敵于天下也彼戰國之
時縱有德義如廉頗白起之儔未易以梃撻也如
其說可用則虞舜周文自可制梃以撻三苗與崇
國矣又言瞽瞍殺人皋陶執之而已謂至公之選
天子不得私也豈有人臣行法而執天子之父之
理使其可執舜負而逃又當追捕也豈知議親議
貴亦公道也此乃執一之病故荀卿詆其僻違而

無類幽隱而無說雖非之太過亦有以致之

李如麋

又曰孟子辭齊王而出弔東郭氏景丑難之孟子無以解紛乃引曾子之言以應之且曰夫豈不義而曾子言之是或一道也孟子嘗曰遁辭知其所窮躬自蹈之矣

同

又曰齊王不可以風孟子不造朝卒至于去何其易也其言見王于崇退而巳有去志及再不合當接淅而行矣乃復遲留于晝三宿怏怏然回望不巳彼遣一介之士則固不能留而宣王亦豈肯親

往邀之哉、此不可曉、

李季可

又曰孟子三宿出書、答高子曰、猶以爲速、而答公孫丑曰、久于齊、非我志也、何前後不同、

王若虛

又曰戰國之士、放蕩四出、仗口舌以要時君、雖孟子大賢、亦千里見梁、且語勾踐以遊、蓋因天子諸侯皆不取士、士無歸故也、

羅壁

又曰王充作刺孟、馮休著刪孟、司馬公作疑孟、李秦伯作非孟、晁以道作詆孟、黃次伋作評孟、各有所見、非若今之胸中無真識、隨時好惡、逐人步趨、

而然

周密

又曰宋人有戲爲詩者不一有曰丐者如何有兩
妾日攘那得許多難當時尙有周天子已勸梁王
又勸齊沈括

又曰史記稱孟子受業于思之門人韓子稱孟子
受業于思按孔子壽七十三孔鯉壽五十一子思
壽六十二孔子卒時子思蓋長矣今從孔子卒之
年數至孟子去齊之年一百六十六年由是推之
孔子少子思百餘歲猶未及受業于門人也

盧格

又曰軻之說諸侯以王、自謂志在平治天下、而仁義則其具也、又謂事在乘勢待時、于時周王在天子之位、得其勢矣、時又極亂、軻曷不抱其具、趨王朝、以復文武之盛乎、旣不適周、則固當覓之諸侯、然軻謂武王以去殘賊而誅紂、顯王又非桀紂之殘賊也、軻何意竟不輔之、又導人奪之也乎、反復推尋、竟主何意、噫、軻之詐心、于此可按而得之矣、豈非以周之衰微已甚、決非其所挾之具、能起之者、不能起之、則終于不用、富貴不可得矣、諸侯方

強假其說以助之、有一得志、則軻爲佐命宰輔、據伊周之位、享伊周之利矣、軻之計、不出此而焉在耶、以是求軻之心、將無所逃、自申

又曰、循韓愈及皮日休輩宋儒之徒、謂孟子獨傳孔子之道矣、由此前諸論、則孟之背孔亦皎然矣、兩日不並立、安可置而不辯、或曰、孟氏書與五經並懸科以取士、今放言如是不虞有干於朝典、比于官刑者乎、曰、是亦糾彈之類也、今或匪人在廷、言者得直攻之、不以方、命爲譴也、孟固王制

所立獨不得比 天子親所擢用之臣乎、芻蕘言之、

聖明裁之本

皇代之法也

同

祝子罪知錄卷一 終

曾孫男世廉謹輯

祝子罪知錄

卷一

四

五